

Adamo & Eva:
In gita al mare
di
Santo Capizzi

Questa storia è semplicemente frutto della fantasia, pertanto ogni riferimento a persone, fatti e luoghi è del tutto casuale.

Santo Capizzi
347 80 60 577
santocapizzi1@alice.it

ADAMO: (*al pubblico*) auh, com'e' possibile ca ogni vota ca ama a nesciti, me mugheri, Eva, havi sempri qualcosa chi fari all'ultimu minutu. E' matematicu! Macari ca 'u sapi 'na simana prima, c'e' sempri qualcosa di fari all'ultimu minutu. E a 'sta vota non puteva essrii diversamenti. Viditi ju fazzu 'u giarnieri comunali, distaccatu a villa do sinnicu, villa paradiso. Essendo oggi festivu , 'u sinnicu mi desi 'u jornu liberu. Allora pinsai, 'u tempu e' bellu, organizzu 'na bella matinata di rilaxinghi a mari. Appena 'u sappi Eva, trasivu in fibbrillazioni. (*Imita la moglie*) ah, e tu i cosi comu i pensi i fai...a mia m'a dari 'n pocu di preavvisu...ju haiu bisognu di tempu pi organizzarimi...(parla Adamo) ma quantu tempu ci aggiuva? Ci 'u dissi deci jorna fa, e appoi chi s'a organizzari? A mari stamu jennu; du panini 'na buttighia di acqua, 'u costumi e 'na tuvaghia. Chi ci voli? (*Verso fuori*) Jeva, comu finivu? Chi tempu voi?

EVA: (*entrando, vestita come da nota*) 'u tempu ca ci voli. Ju haju bisognu di tempu, e appoi haiu a cuntrullari a lista de cosi di purtari.

ADAMO: ca certu alli voti ni scurdamu qualche cosa, comu facemu...ammenzu a jungla desertica.

EVA: mutu statti. Ora ju ti leggiu a lista e tu mi dici su pighiamu tutti i cosi.

ADAMO: ma su m'haju a stari mutu comu t'arrispunnu?

EVA: a quantu si lisciu! Allora, lista di sopravvivenza, sezione materiale logistico: ombrelloni, linzolu bonu con funzione di cummoghju...

ADAMO: ca certu ci voli 'u linzoli bonu, non c'abbastava 'na tuvaghia comu e ghie'.

EVA: 'u linzolu ha essiri di chiddu bonu, pirchi' caru miu, a genti comu ni vidi ni tratta. Unni erumu arrivari? A si, linzolu bonu p'allippallu 'ndi l'ombrelloni ad evitare il surriscaldamento delle persone sottifere che stanno sotto li ombrelloni sopra mensolati. Molletti di lignu p'allippari 'u linzolu all'ombrelloni.

ADAMO: pi forza di lignu hannu a essiri 'sti muletti?

EVA: ovviu! Chiddi di plastica co caudu di ddu filu di menzu jornu, squaghanu.

ADAMO: esagirata, e chi stavumu jennu a mari 'nda l'Africa equazionale!

EVA: seggi grapi e chiudi e tavulinu a valigia, seggi a sdraio, con annessi cuscini e tivaglia pi non ampicari 'nde fili di plastica da seggia a straia e ombrelli alli voti si metti a chioviri. Ora sottosezione logisticu strateggicu: carta igienica, tuvaglia p'e manu, tuvaghia p'e pedi, tuvaglia p'o bide', salviettini intensificati, (*pausa poi in rapida successione*) vasinu, paleta e pappaiaddu, non si po' mai sapiri.

ADAMO: a chi mi saiu jennu a ricoverari o Vittoriu?

EVA: ora passiamo alla sezione lurida.

ADAMO: cioè ca 'sta fitennu?

EVA: ma chi dici bestia, lurida cioè del divertimento.

ADAMO: ludica, si dici Eva, ludica. E a bestia fussi ju?

EVA: carti siciliani, dama, bocci, tamburelli, palluni di palla a volo, palluni di calcio, frisbico, racchietti di pinghi e pongo...

ADAMO: e chi avumu a grapiri 'n villaggiu turisticu, 'n 'agenzia di animazioni!

EVA: settimana anna gmisticistica, paparella 3000, a sicilia e 'u postamarketti. I caricasti n'd machina?

ADAMO: i caricai.

EVA: sezione protezione autospecifica: oghiu prostezione 40,39,38,37,37,...

ADAMO: c'e' bisognu ca mi elenchi tutti? Basta ca dici olii e ju capisciu ca intendi, protezioni da 40 a 1, non si sa mai, alli voti cancia 'u tempu, chi fa ni facemu attruvari impreparati.

EVA: cappeddi, occhilai da sole, acetoni e smalto pi l'ugna, colliriu pi l'occhi, burru di cacau, pinnula p'a pressioni, acqua c'o sali, acqua c'o zuccuru.

ADAMO: si, sessi a limoni, e champagninu.

EVA: e ora passiamo alla sezione, vettovagliamento: serviziu di piatti, serviziu di bicchieri, serviziu di furchetti, serviziu p'o cafe', serviziu p'o te.

ADAMO: gioia, chi fa n'a purtamu a credenza, alli voti n'aggiuvassi?

EVA: e per finire ora ti elencu a sezioni cibaglia e bevaglia. Sottosezione bevaglia: acqua liscia, acqua gassata, top cola, aranciata, vinu, birra, spuma p'o vinu e cafe'. Sotto sezione cibaglia. Ouh Adamu, ti anticipu ca 'sta vota cucinai leggera, pirchi' l'ultima volta mi 'ntisi un pocu appesantita.

ADAMO: pottuni essiri ddi dui cocci di cirasa ca ti mangiasti a fini.

EVA: Allura: muluni giallu e prosciuttu crudu, 'nsalata di puppu, cozzulu fritti, pepata di cozzali di messina, puppetta si muccu, tunnina c'a cipuddata, masculini a baccaficu, fungi, cacocciuli sott'oghiu e alivi janchi e nivuri cunsati (*pausa*), chistu pi antipastu! Poi, pasta che mulinciani e ricotta salata, cannelloni, e 'nslata di risu pi primi, cutuletti fritti, parmigiana, puppittunu pi secunnu, pipi arrusti a 'nsalata e mulinciani c'o pummaroru pi contornu. Adamo non vosi esagerai.

ADAMO: certu, giustu. E appoi mi pari a mia ca a 'sta vota di mantinisti appiddaveru leggera.

EVA: e per finire mulini, pessica, abbicocchi e sbergi, amaru, ammazza cafe' e... bicarbunatu, alli voti l'aria do mari n'avissa a disturbari 'u stomacu.

ADAMO: hai fatto bene. Non si po' mai sapiri d'aria do mari e pisantuna, l'aria...do mari...

EVA: e per finire a lista de partecipanti: (*pausa*) ju e tu. Ci semu?

ADAMO: ju si, tu tantu assai non mi pari ca ci si.

EVA: avanti, i mittisti tutti i cosi 'nda machina.

ADAMO: tuttu cosi. (*Al pubblico*) Dda machina, 'na 127 sport cu appena 357 000 chilometri supra e cupirtuni, puvuredda mi 'sta facennu pena, mi passi 'n furgoni passo lungo. Figurativi ca mentri caricavu l'ultimi cosi, mi 'ntisi chiamari: Adamo...Adamo... mi furriu e non vidu a nuddu. E ancora: Adamo, Adamo...alla fini 'u sapiti cu era? Era un pistuni ca era stato eletto rappresentati sindacali di tutte le parti do muturi. 'U pistonu, s'affaccia, mi chiama, e chiancennu lacrimi di olio motore mi dissi supplicannumi: Adamu no! Pi favuiri, pi pieta', ti scongiuramu non ni fari fari n'auttru viaggio accussi carichi. T'avvettu putissi essiri l'ultimu ca facemu, p'o forti sfrozu ci putissimu arristari sicchi. E ju, poviru svinturatu vittiva di me mugheri chi ci puteva diri? Mi trattini' 'na lacrima e mutu m'arricughi' a casa.

EVA: e anche questa e' fatta. Ju sugnu quasi pronta...

ADAMO: havi de setti e menza ca m'u dici.

EVA: no, pronta sugnu, 'u tempu d'attruccarimi...

ADAMO: attruccariti? Ma stamu jennu a mari non a n'matrimoniu.

EVA: du minuti, m'attruccu, mi mettu i scarpi, m'arricogghiu a biancheria stinnuta pirma ca chiovu.

ADAMO: chiovu? C'e' n' suli ca spacca i petri.

EVA: pronta sugnu, e comu e' ca ti lamenti sempri. Giustu 'u tempu di sciacquari du piatti ca annunca svumicanu fetu e m'anfettanu na cucina.

ADAMO: ma comu, dici ca eri pronta? Sunu i deci a chi ura ama a nesciri da casa? Ma voi fari godiri 'n pocu 'sta jurnata di mari?

EVA: e bonu non fari d'accussi', ca ci hai ben 2 ora pi rilasariti a moddu.

ADAMO: comu du uri? Dopu tuttu stu schifiu?

Finale 1

EVA: ca certu, e dudici e menza c'e' a 435° puntata da schiava Isaura. Ci fa ma perdu?

ADAMO: (*al pubblico*) ed e' sempri d'accussi' ogni vota ca niscemu. Jorna di preparativi pi qualche ura di rilaxinghi. Ma m'addumannu ju, su tutti d'accussi' i fimmini quannu si tratta di nesciri? O forsi sugnu ju l'unicu svinturatu!

Finale 2

EVA: ca certu, e dudici e menza c'e' a 435° puntata da schiava Isaura. Ci fa ma perdu?

ADAMO: (*al pubblico*) ed e' sempri d'accussi' ogni vota ca niscemu. Jorna di preparativi pi qualche ura di rilaxinghi.

EVA: forza amuninni, spicciamuni ca dabbiamo passari a pigghiari e me matri.

ADAMO: pirchi', chi ci veni macari dda strafallaria?

EVA: ca certu!

ADAMO: matri e cu sa sumpotta! Senti paparella do me cori, u sai chi ti dicu? Dui uri sunu macari assai. Iemu n'abbuddamu e n'arricughemu a casa di tutta cursa!

Finale 3

EVA: ca certu, e dudici e menza c'e' a 435° puntata da schiava Isaura. Ci fa ma perdu?

Finale 4

EVA: ca certu, e dudici e menza c'e' a 435° puntata da schiava Isaura. Ci fa ma perdu? Ora forza...avanti marc!

ADAMO: u vidusturu comu mi finivu? Zi padrona, obbedisco!

FINE

Note:

- 1) Adamo si presenta in scena con maschera, pinne, secchiello e paletta da sabbia.
- 2) Eva si presenta in scena con cuffia da doccia per i capelli e costume da bagno o altrimenti comicamente abbigliata.